

Terapia e dimora en in'istituziun per il giuven incendiari

Il derschader explitgescha intgins mecanissem dal dretg penal per giuvenils

CUN HERMANN LAIM HA DISCURRI
CLAUDIA CADRUVI / ANR



FOTO M. HARTMANN

■ **In chasti cundiziunà da 10 mais prashun survegn l'empredist ch'ha dà fieu il december 2017 la Landi a Tusaun. Sch'el na commetta betg auters delicts na sto el pia betg ir en prashun.** La dretgira per giuvenils a la Dretgira regiunala Alvra ha ier plinavant communitgà ch'il giuven um survegnia terapia ed ha per il mument da viver en in'istituziun averta. *Hermann Laim*, il president da dretgira Alvra, explitgescha la muntada da questas instituziuns e pertge che chastis per giuvenils ston sa differenziar da quels per creschids. La sentenza da la dretgira n'ha anc betg vigur legala. La Procura publica u il sentenzià pon anc trair vinavant il cas.

La dretgira ha ordinà ch'il giuven vegn en in'istituziun per giuvenils. Tge gener dad instituziun è quai?

Hermann Laim: Igl è in'istituziun spezialisada sin basegns da giuvenils. Talas instituziuns existan era per creschids.

La finamira è ch'il giuven delinquent chattia ina buna via

Datti talas instituziuns per giuvenils er en il Grischun?

Gea, i dat pliras.

La dretgira ha era decidì ch'il giuven haja da far ina terapia. Pertge?

Gronda responsabladad porta ina dretgira che giuditgescha davart in delinquent giuvenil. Hermann Laim, president da la dretgira Alvra, di: «Quai va schon manaivel ed occupescha ins.»

Exact pertge na sai e na dastg jau betg dir. Ma i sa tracta dad ina terapia psicoterapeutica.

Quant ditg ha il giuven da restar en questa instituziun e quant ditg dura la terapia?

Quai è avert. I n'è betg l'incumbensa da la dretgira da fixar il temp. La mesira da protecciun vegn mintg'onn examinada ed adattada a la nova situaziun. Tar giuvenils po la mesira cuzzar maximalmain fin al 25avel onn da vegliadetgna.

La dretgira Alvra ha sentenzià il giuven ad in chasti cundiziunà da diesch mais prashun. N'è quai betg memia miaivel per insatgi ch'ha chaschunà in incendi cun donns da sis milliuns francs?

El ha la vita anc avant el

Il chasti maximal è quatter onns tar giuvenils. En quest rom da quatter onns ston esser pussaivel da chastiar era delicts ch'èn bler pli gravants. Per exempel sche persunas èn grevmain blessadas, violenza cun armas e natiralmain er in mazzament. Tut quai ston ins pudair sentenziar cun quatter onns. Sch'ins dess per exempel gia trais onns per in incendi – era sch'igl è stà in grond incendi – han ins strusch pli a disposiziun pli gronds chastis per delicts bler pli gravants. Sch'ins metta tut quai en relaziun è la dretgira da l'avis ch'i sa tracta d'in chasti commensurà.

Pertge èn ils chastis per ils giuvenils en general bler pli bass che per creschids?

Noss sistem na metta per ils giuvenils betg la prioritad sin il chasti, mabain sin la mesira da schurmetg. Perquai ha la dretgira piazzà il giuven en ina instituziun per basegns spezialis. La finamira è da protegger e da purtar enavant il giuvenil, uschia ch'el chatta la finala la via senza agid extern e senza agid da glied spezialisada.

I sa tracta pia d'ina sort educaziun u da la cuntinuaziun da l'educaziun. Il giuven ha survegnì in chasti cundiziunà. Vul quai dir, sch'el commetta anc in delict, per exempel in enguladitsch, ch'el vegn lura en prashun?

Quai na poss jau betg dir ordavant. I dependess lura da la dretgira che fiss cumpetenta. Lezza pudess decider da cuntinuar u da revocar il chasti cundiziunà.

Sco derschader essas Vos As basads sin pliras expertisas da persunas dal fatg. Tge paisa han las expertisas gi?

Ellas han gi fitg gronda paisa. Quai avain nus era scrit en la comunicaziun da medias. Ils detagls avain nus aposta betg communitgà, pertge igl èn aspects che van fitg spert en la sfera persunala che stat sut protecciun en il dretg penal da giuvenils (guarda fanestra).

Sco derschader purtais Vos ina gronda responsabladad per l'avegnir dad in giuven che stat avant dretgira. Ha quest cas occupà Vos – persunalmain e betg mo professunalmain – pli ferm che auters?

Quai va schon manaivel ed occupesch'ins senz'auto. En l'entira situaziun ston ins empruvar da chattar soluziuns e da metter il dretg med a disposiziun per sustegnair in svilup sanadaivel per il giuvenil. El ha la vita anc avant el.

Las expertisas han gi fitg gronda paisa

Per giuvenils valan auters princips

Per delinquent fin 18 onns valan in pau autras reglas che per creschids. Betg il chasti stat en il center, mabain la protecciun ed educaziun da la persona minorena. Aposta per quai exista ina «lescha federala davart il dretg penal per giuvenils» che preveda ordinaziuns e mesiras dad accompagnament ed educaziun. «Igl è era pussaivel che giuvenils survegnan in chasti», scriva la dretgira Albula en sia comunicaziun dad ier. «Pussaivel èn per exempel schurnadas, multas u prashun fin 4 onns.» Auto che tar creschids n'è la procedura avant dretgira ord resguard sin il giuvenil betg publica, vul dir che la glied na po betg ir a tadlar las tractativas ed era la sentenza che cuntegna tut las argumentaziuns dals derschaders na vegn betg publicada. Sch'i sa tracta dentant d'in delict ch'ha sveglià l'interess public, sco quel dal brisament da la Landi a Tusaun, lura infurmescha la dretgira la publicitad davart il stan da la procedura.